

## EXERCICIOS CON SOLUCIÓN

1. - Imaxínate que queres montar un taller de carpintaría. Indica cinco investimentos ou elementos da estrutura económica que necesitarás realizar para iniciar o negocio e algunhas fontes financeiras que utilizarías.

2.- ¿ Pódese utilizar varias fontes de financiamento para unha inversión?

3. - Imaxínate que tes un negocio dedicado á compravenda de roupa deportiva, identifica polo menos oito elementos patrimoniais do activo e clasifícaos esquematicamente segundo a súa permanencia na empresa e explica o seu significado.

4. - Partindo dos elementos patrimoniais que se relacionan a continuación, sinala a estrutura económica e a financeira.

Local comercial 25.000, mobiliario 10.000, elementos de transporte 30.000, mercadorías 20.000, caixa 1.000, capital social 64.000, préstamos a longo prazo 15.000, provedores 2.000.

5. -Comenta a principal diferenza e analogía entre autofinanciamento de mantemento e autofinanciamento de enriquecemento.

6. - PAU ¿Que se entende por autofinanciamento? Sinala algunhas das súas vantaxes.

7. - Unha sociedade necesita repoñer a flota de camións .Para iso recorre ás súas fontes de financiamento internas ou autofinanciamento ¿ Que fonte interna debería utilizar para repoñer os camións?

8. - Define o financiamento interno ou autofinanciamento e o financiamento externo. Cita tres exemplos de cada unha delas.

9.- ¿En que se diferencia un crédito dun préstamo?

10.- ¿ Que é o leasing? Menciona algunha do seu características.

11. - Clasifica as seguintes fontes de financiamento segundo os diferentes criterios:

- Fondos de amortización➔
- Capital social➔
- Empréstitos➔
- Préstamos➔
- Reservas➔
- Leasing➔
- Descontos de letras➔
- Factoring➔

12. - Diferencia entre financiamento interno e financiamento propio.
- 13.- ¿ Que é o factoring?. ¿ Qué vantaxes e inconvenientes ten o factoring?
14. - Diferencia entre mercado primario e mercado secundario de capital

## **SOLUCIÓN**

**1. - Imaxínate que queres montar un taller de carpintaría. Indica cinco investimentos ou elementos da estrutura económica que necesitarás realizar para iniciar o negocio e algunhas fontes financeiras que utilizarías.**

Investimentos ou elementos da estrutura económica: o local, a maquinaria, o mobiliario, a madeira e o verniz, os ordenadores e impresoras, o diñeiro no banco e o efectivo, etc.

Fontes financeiras: os aforros, un préstamo bancario a 6 anos e outro a 4 meses, os aprazamentos de pagamentos que nos conceden os subministradores de madeira, pintura, l (provedores), etc.

**2.- ¿Pódense utilizar varias fontes de financiamento para unha inversión?**

Si. Por exemplo, unha máquina industrial o prezo de adquisición da cal é de 20.000 €, poderíase financiar do seguinte xeito: 5.000 mediante as achegas dos socios e o resto a través dun préstamo bancario.

**3. - Imaxínate que tes un negocio dedicado á compravenda de roupa deportiva, identifica polo menos oito elementos patrimoniais do activo e clasifícaos esquematicamente segundo a súa permanencia na empresa e explica o seu significado.**

Os elementos ou investimentos do activo non corrente son aqueles bens ou dereitos que van permanecer na empresa durante un período prolongado de tempo. Os elementos do activo corrente está formado pola parte da estrutura económica da empresa que está en continuo movemento ou circulación. A xeito de exemplo, os vehículos (activo non corrente) permanecerán varios exercicios económicos antes de que se teñan que renovar e as mercadorías (activo corrente) constantemente están a saír (por vendas) e entrando novas (por compras).

#### **ACTIVO NON CORRENTE**

- Local comercial
- Estantes
- Máquina rexistradora
- Impresora
- Vehículo de transporte

#### **ACTIVO CORRENTE**

- Mercadorías ( roupa deportiva)
- Cliente
- Diñeiro en bancos e caixa

**4. - Partindo dos elementos patrimoniais que se relacionan a continuación, sinala a estrutura económica e a financeira.**

**Local comercial 25.000, mobiliario 10.000, elementos de transporte 30.000, mercadorías 20.000, caixa 1.000, capital social 64.000, préstamos a longo prazo 15.000, provedores 2.000.**

<b>ACTIVO</b> <b>( Estrutura económica )</b>		<b>PATRIMONIO NETO E PASIVO</b> <b>( Estrutura financeira)</b>	
ACTIVO NON CORRENTE	65.000	NETO PATRIMONIAL	64.000
Local comercial Mobiliario Elementos de transporte	25.000 10.000 30.000	Capital	64.000
		PASIVO NON CORRENTE	15.000
		Préstamos a longo prazo	15.000
ACTIVO CORRENTE	21.000	PASIVO CORRENTE	7.000
Mercadorías Caixa	20.000 1.000	Provedores	7.000
TOTAL ACTIVO	86.000	TOTAL PASIVO E NETO	86.000

**( Estrutura económico ) ➔ Destino da inversión**

**( Estrutura financeira) ➔ Orixe dos medios financeiros**

**5. -Comenta a principal diferenza e analoxía entre autofinanciamento de mantemento e autofinanciamento de enriquecemento.**

A principal semellanza é que as dúas son fontes de financiamento que foron xeradas pola propia empresa.

A diferenza principal é que o autofinanciamento de mantemento está formada polos fondos de amortización acumulados da empresa e o seu destino debe ser a reposición ou renovación dos elementos do activo non corrente do inmovilizado para os cales foi creada

E os fondos de provisións que serven para facer fronte a certas perdas que aínda non se produciron .Estas fontes son para manter a capacidade produtiva da empresa

O autofinanciamento de enriquecemento está formada pola parte dos beneficios que retivo a empresa (que non os repartiu entre os socios a través do dividendo) para fortalecerse e a súa aplicación poderá ser para aumentar a capacidade produtiva.

**6. - PAU ¿Que se entende por autofinanciamento? Sinala algunhas das súas vantaxes.**

As fontes de financiamento xeradas pola propia empresa, poden ser de enriquecemento serven para ampliar a capacidade produtiva da empresa (reservas) ou de mantemento chamadas así porque non fan crecer á empresa, senón que serven para mantela. Dentro dela diferenciamos entre fondos de amortización e de provisións.

As vantaxes das fontes de financiamento interno son que a empresa non depende do mercado de capitais, e ten, polo tanto, maior autonomía, e menor custo, xa que non hai que devolvelas nin pagar interese nin comisións, só o custo de oportunidade.

**7. - Unha sociedade necesita repoñer a flota de camións .Para iso recorre ás súas fontes de financiamento internas ou autofinanciamento ¿ Que fonte interna debería utilizar para repoñer os camións?**

É unha fonte financeira que a xera a propia empresa a través da súa actividade. Deberá utilizar os fondos de amortización que anualmente foi creando para cubrir a depreciación da flota dos camións e que constitúen o autofinanciamento de mantemento.

**8. - Define o financiamento interno ou autofinanciamento e o financiamento externo. Cita tres exemplos de cada unha delas.**

O financiamento interna ou autofinanciamento é aquela que é xerada pola propia empresa como as reservas ou os fondos de amortización .y as provisións A financiamento externo é a que se obtén de terceiros ou do exterior como, por exemplo, as achegas dos socios (recursos propios) e un préstamo bancario a curto ou longo prazo (recursos alleos)

**9.- ¿ En que se diferencia un crédito dun préstamo?**

No crédito só se pagan intereses pola cantidade e o tempo que se dispuxera e non polo límite total do crédito concedido. No préstamo páganse intereses polo importe total do préstamo concedido.

O crédito utilízase para cubrir desaxustes temporais de tesouraría ou liquidez mentres que o préstamo se utiliza para financiar investimentos.

#### **10.- ¿Que é o leasing? Menciona algunha das súas características.**

É un contrato de arrendamento financeiro con opción de compra. É unha fonte financeira externa e recurso alleo a longo prazo. Características:

1. É un instrumento financeiro para a utilización de bens de equipo sen realizar a inversión inicial para iso.
2. Desprazamento do risco de envellecemento dos bens arrendados á empresa leasing.
3. Deducións fiscais das cotas do leasing.

#### **11. - Clasifica as seguintes fontes de financiamento segundo os diferentes criterios:**

- **Fondos de amortización**→ Longo prazo, interna, propio, autofinanciamento de mantemento
- **Capital social**→ Longo prazo, externa, propia
- **Empréstitos**→ Longo prazo, externa, allea
- **Préstamos**→ Longo ou curto prazo, externa, allea
- **Reservas**→ Longo prazo, interna, propia, autofinanciamento de enriquecemento
- **Leasing**→ Longo prazo, externa, allea
- **Descontos de letras**→ Corto prazo, externa, allea
- **Factoring**→ Corto prazo, externa, allea.

#### **12. - Diferencia entre financiamento interno e financiamento propio.**

O financiamento interna ou autofinanciamento é aquela que é xerada pola propia empresa como as reservas ou os fondos de amortización e as provisións

O financiamento propio é un concepto máis amplo, inclúe ademais do financiamento interno, as achegas dos socios ( capital social ).

### 13.- ¿ Que é o factoring?. ¿ Qué vantaxes e inconvenientes ten o factoring?

Unha empresa de factoring, encárgase de cobrar os dereitos de cobro (letras de cambio, pagarés, facturas, ) doutras empresas.

O factoring ten as mesmas vantaxes que o desconto de letras, subministra liquidez e evítase a xestión de cobramentos, coa vantaxe engadida de que unha vez vendidos os dereitos, a empresa se libera do risco de posibles non pagamentos, xa que ese risco se traslada á sociedade factoring.

O seu maior inconveniente está no seu elevado custo, xa que a sociedade factoring cobrará unha comisión que lle cubra o risco e un interese por anticipar os cobramentos

### 14. - Diferencia entre mercado primario e mercado secundario de capital

**O Mercado primario** é o mercado onde se colocan por primeira vez os activos financeiros (accións e obrigas emitidas), normalmente fanse a través de entidades financeiras

**O Mercado secundario** é onde a pode realizan as operacións de compravenda dos activos financeiros que previamente foron adquiridos no mercado primario ou en propio mercado secundario. Son verdadeiros mercados de revenda ou de segunda man, suxeitos á lei da oferta e da demanda. O exemplo máis representativo é a Bolsa de valores.